

善化縣志

善化縣志

善化縣志卷之十七

官師

古侯地百里今邑宰古侯封也善化分建縣治肇於宋元符
元年論者謂取令宰倡化邑人向善之意其紀官也首縣宰
次師儒次丞尉次汛守主之佐之教誨而干城之母鰥爾職
毋曠厥官相助爲理民日遷善而不知豈小補哉志官師

歷代官制考

知縣

周制五鄙爲縣有縣正各掌其縣之政令然止二千五百家耳且爲遂大夫之屬吏而六鄉無之固與後世之縣不同又四井爲邑四甸爲縣邑方二里縣方十六里亦與後世迥殊春秋傳上大夫受縣下大夫受郡縣大於郡較之秦漢以郡統縣尤不相合惟春秋時有所謂邑宰者卽後世之縣令其或謂之尹或謂之公或謂之大夫則諸國名稱不同原不能一致也

秦令長

漢令長皆仍秦官掌治其縣萬戶以上爲令秩千石至六百

石減萬戶爲長秩五百石至二百石凡縣道國邑列侯所食
縣曰國皇太后皇后公主所食曰邑有蠻夷曰道

東漢縣萬戶以上爲令不滿爲長侯國爲相掌治民顯善勸
義禁暴罰惡理訟平賦恤民秋冬集課上計於所屬郡國
晉大縣令有治績宜報以大郡不經宰縣不得入爲臺郎
南宋諸縣令銅印墨綬進賢兩梁冠

南齊令

梁令長

陳令長

北齊令有上中下九等

隋令

唐縣令有赤畿望緊上中下京縣爲赤旁縣爲畿四千戶爲望三千戶爲緊二千戶爲上千戶爲中不及千戶爲下令導風化察冤滯聽訟獄凡民田收受縣令給之每歲季冬行鄉飲酒禮丞爲之貳縣尉分判

五代任官凡齷齪無能者始注爲縣令縣率不治

宋縣令初亦如唐建隆元年以朝臣爲知縣自政和後士大夫輕縣職靖康後詔初改官必爲縣乾道後詔知縣以二年爲任總治民政勸課農桑平決獄訟有德澤政令則宣布於治境凡戶口賦役錢穀賑濟給納之事皆掌之以時造戶版及催理二稅有水旱則有災傷之訴以分數蠲免撫存安集無使失業有孝弟行義聞於鄉閭者具事實上於州激勸以

勵風俗

元達魯花赤尹縣分上中下縣各有達魯花赤掌印知縣尹掌判署事又有赤縣達魯

明知縣縣分三等十萬石爲上從六品中縣正七品三萬石爲下從七品已皆爲正七品

國朝知縣因明制俱正七品有最要要緊中簡四項善化衝繁難要缺

雍正五年奉

上諭守令乃親民之官關係百姓之休戚故得其人則民被澤而風俗日厚不得其人則民生受累而風俗日薄自古安民必先察吏此不易之經也朕御極以來夙夜孜孜欲使薄海之內無

一夫不獲其所而此願一時難遂者則以縣令之不能盡得其人也果能得有猷有爲之人布散各省分膺民社之寄彼一人之精神力量足以貫注乎一邑凡督撫大吏耳目心思之所不能徧及者縣令皆能體察經理之則民生安得不厚風俗安得不淳而朕心無一夫不獲之願於是乎可遂矣向來各省縣令多循資按次照例選用之員故其中庸碌無能者有之年力衰憊者有之少不更事者有之以致苟且因循貪位竊祿諸事闕冗職掌廢弛此等之人尙不能顧一身之考成豈能爲地方之憑藉乎今因會試後天下舉子齊集京師朕思其中必有才品兼優之士是以特加遴選畀以縣令之任爾等亦各鼓舞踴躍欲乘此年力精壯之時爲國家宣猷效用意亦甚善然朕之望

於爾等者不僅在於辦理刑名徵收賦稅了簿書期會之責而已必須實盡父母斯民之道視眾庶爲一體剛柔相濟教養兼施化澆薄而爲淳良懲儉邪以安善類古稱愛民如子此語最宜體會父母愛子之心未有不教之正者縣令果視民如子豈有優柔貽害姑息養奸行婦人之仁忘聖賢之義而可謂之痼瘕保赤者乎書經曰罔違道以干百姓之譽自古聖賢爲治皆尚實政最惡虛名若時存沽名市惠之心必至爲同流合污之鄉愿又何能爲整綱飭紀之良吏乎從來父子之間施者不以爲恩受者並忘其感守令之於民果能潛移默化使閭閻習爲固然而泯其感頌之迹斯不愧父母之稱而媲美古之循良矣紳士居鄉每多違理肆行之處且師生年誼固結攀援弊端種

種朕令有司約束勸導之者無非欲其屏除舊習同歸於善並非令地方官有意摧折之也爾等莅任後於紳士之品行端方者則當加意敬禮以樹士民之坊表其小有過愆者則勸戒之令其悛改其不可覺悟不可寬宥者則寘之於法以警其餘如此則賞罰公明輿情悅服而觀感興起比戶可封矣爾等旣叨鄉薦皆以古之孝廉相比擬所當早夜思維何以克副此孝廉二字平時株守寒窗則以不獲見用爲歎今見用矣正可展布素懷發舒夙抱且以下第之人選期尙遠而朕破格遴選授以官職卽論感恩圖報之常情亦當人人自奮況朕實仗爾等爲朕教養斯民移風易俗以成一道同風之盛爾等豈可薄待其身而爲陋習所漸染私欲所牽制乎爾等果能卓然自立不負

選用朕自格外加恩儻拜命之初一時感激而莅官以後頓改初心則不但國典王章無可寬貸卽清夜自思亦應無地自容矣勉之勉之

乾隆九年奉

上諭朕君臨天下愛育黎元厚生正德時切於寤寐蓋教養雖爲二端而實則相爲表裏衣食足乃可興禮義饑寒迫則罔顧廉恥是不能養民不可以言教民仍不得謂之養故教卽在於養之中養卽收教之效其理其勢固如此也乃今之司牧者但知用心刑名錢穀自顧考成苟免無過便爲得計上官亦卽以爲稱職其視百姓爲一體視民事爲家事以實心行實政經畫有方勸課有法使地無遺利家有蓋藏者百不得一雖遇有收之

年而小民之生計亦窘及荒歉偶形議蠲議賑已非上策而胥吏作奸豪強侵蝕種種弊端不可枚舉其百姓之狡猾者又復捏虛領賑欲無饜足以致效尤囂凌刁風日熾此雖百姓之無良亦由有司之不能教養於平日賈誼所謂移風易俗使天下回心而向道類非俗吏之所能爲也朕以教養之責付之天下督撫督撫分任之州縣此古親民之官與百姓最爲切近其所轄之地不過數十里或一二百里形迹不甚隔絕情意易於流通果能視百姓如赤子察其飢寒恤其困苦治其田里安其家室以父母斯民之誠心行父母斯民之實政凡茲小民具有秉彝斷無有不中心感激服教從風者外省向設宣諭化導使究之一二人之身難以家喻而戶曉且經年累月一至其地未免

一暴十寒終不若州縣各于其民懃懃懇懇惟教養是務以養
爲教之本以教成養之功不爲異文不沽虛譽但期實有裨於
民生而不責效於旦夕爲督撫者又當開誠布公諄切誨訓良
吏則嘉獎成全之其不及者則督率勸戒之聖人曰至誠而不
動者未之有也如督撫果以實心課吏有司果以誠心愛民歲
月旣久漸摩淪浹庶幾教養可副朕之厚望焉

又奉

上諭爲治以安民爲本安民以教養爲本二者相爲表裏而不可
偏廢務求實效而不事虛名乃克盡父母斯民之道蓋人君總
其成於上而分其任於督撫督撫總其成於上而分其任於州
縣州縣者民之司命而又於民最親者也身居此官身履此地

耳聞目擊切近易知非地遠情疏遙爲揣度者可比是則生民之休戚民俗之純疵雞犬桑麻之細日用飲食之常良莠之一其類勤惰之各異其情必一一洞悉於其中而後可以加之調劑所謂知州必能知一州之事知縣必能知一縣之事顧名思義循名責實豈簿書錢糧無誤期會遂謂可勝任而愉快也朕御極以來孜孜圖治訓飭大吏廣勵羣僚至再至三辭繁意複無非欲措斯民於衽席之安復斯民以降衷之性而細察近來有司究不免奉行故事罕有能深體朕意以致實政而收實效者夫一州一縣之事既不能周知洞見則官之與民益相隔而不能相親欲其視民之疾苦如家人之困厄視民之作僞如子弟之愆謬救焚拯溺竭力殫心不可得矣州縣所屬地方雖

廣狹不一事務亦繁簡不同然一月之中豈無齋戒停刑之日
亦有因公下鄉之時果能乘此餘暇不辭勞瘁親履田間與父
老子弟歡然相接如家人父子言孝言慈啟其固有之良化其
惰窳之習而詢問疾苦講求利益度其原隰相其流泉審土物
之宜因閭閻之便利所當興者舉之害所當除者去之則養與
教兼施善政莫大乎是至於身所不能徧及之處則有約正值
月人等或給之廩餼或加之獎誘使之分佈四鄉代爲化導亦
可冀其分任耳目以助官之不及務使一州一邑之民情聯勢
合如父子兄弟之相爲扶掖如頭目手足之相爲捍衛一州一
邑如此他州他邑從而效之一郡一省如此他省他郡從而效
之始則艱苦久則漸近自然所謂日計不足月計有餘古之循

吏獨不可再見於今歟是在爲督撫者實心以勸課屬吏爲州縣者實心以愛育羣黎勉強力行毋憚勞勩政成於上民悅於下事有必至理有固然語曰至誠而不動者未之有也爲其事而無其功者亦理之所無也用是再頒此旨通行訓誨自督撫以至州縣各官皆當身體力行以奏治效毋徒視爲具文焉

又奉

上諭直省州縣地方繁簡不同屬員中才具短長亦不一是以準各省督撫酌量人地相宜題請調繁調簡以收器使之益惟是調繁之員該督撫旣已特疏保舉向後非踰閑蕩檢未必不格外優容調簡之員該督撫旣已置之下考向後縱奮勉向上未必肯卽登薦章朕觀各督撫於屬員調繁之後因其貪劣改操

而檢舉糾參者尙偶有之至於調簡之後因其政績可觀復行
薦拔者十不獲一此則成見私意之未化非虛公察吏成就人
才之道也嗣後督撫等於調繁調簡之員均當秉公體察屏去
成心覘其後效凡先舉而後參者國家有檢舉之條若先調簡
而後保薦者亦著疏內摺內聲明具奏如此則被薦者必加儆
惕之心卽更調者亦獲黽勉自新之路庶整飭吏治之一策歟

知縣年表

唐以前無考

宋

舒邦佐

元

潘必大